

Inatsisartut Suleriaasianni § 33, imm. 3, nr. 1 malillugu Nunat Avannarliit Killiit Siunnersuisoqatigiiffiannut aallartitat siulittaasuata aalajangiiffigisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 4/2023-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni efterskolit akornanni suleqatigiinnerup annertusineqarnissaanut periarfissat misissoqqullugit, tassungalu ilanngullugu atuartut efterskolimiinnermut aningaasanik qinnuteqateqarsinnaanissamut periarfissaat misissoqqullugit.
(Aallartitat siulittaasuata Doris J. Jensen)

Tungavilersuut:

Naalagaaffiit nunamik, kulturimik innuttamillu qanimut misigisaqarfigunikkitt tamanna naalagaaffiit akornanni ataqatigiinnermut, suleqatigiinnermut attaveqatigiinnermullu nukittorsaataassaaq. Nunani avannarlerni killerni inuusuttut imminnut ilisarismanerulernissaminnut periarfissineqarnissaat suleqatigiinnerup siunissami nukittorsarneqarnissaanut qulakkeerneqarnissaanullu pingaaruteqarpoq, ataatsimut soqutigisat suleqatigiissutigineqarnissaat Nunat Avannarliit Killiit Siunnersuisoqatigiiffiata anguniagarimmagu.

Inuusuttut savalimmiormiut kalaallillu atuarfimmi 9. klassi naammassereerlugu Danmarkimi efterskoleriartarnerat nalinginnaasorujussuuvuq. Ullumikkut Savalimmiuni Kalaallillu Nunaanni efterskoleqarpoq. Islandimi efterskoleriartitsisarneq ileqqorineqanngilaq.

Nunanili avannarlerni killerni inuusuttut nunani avannarlerni killerni nunamut allamut efterskoleriartarnissaanni pitsaaqutaasussat arlaliupput. Tamanna inuusuttut nunat avannarliit killiit taakkunanilu innuttaasut eqqaamasaqarfigalugit periartorsinnaanerannut kiisalu nunani avannarlerni killerni inuusuttut inuttut, oqaatsitigut kulturikkullu imminnut ilisimasaqarfigilernissaannut peqataaqataasinnaavoq. Taamaalilluni nunat avannarliit killiit ataatsimut kinaassuseqarnerat nunat avannarliit assigiimmik kultureqarnermikkut suminngaanneersuermikkullu pigisaat efterskolimiittoqartarneratigut nukittorsarneqarsinnaavoq.

Nunani avannarlerni killerni inuusuttut ilinniarnertuunngorniarfimiinnerat pillugu NGK-mik aaqjissuussineq (atlantikap avannarpasissuani ilinniarnertuunngorniaqatigiit, Danmarkip, Islandip, Savalimmiut Kalaallillu Nunaata akornanni suleqatigiiffiusoq) assorsuaq ingerlalluarsimavoq aammalu suliasaqarfimmi tamatumani nunat assigiinngitsut akornanni suleqatigiittoqarnerata inuusuttut nunat allat taakkulu kulturiat inuiatigiivinilu pissutsit nalinginnaasut pillugit annertuumik ilisimasaqalersikkaat paasineqarluni.

Nunani avannarlerni killerni nunami efterskolimiinnermi unammilligassat annertunerpaat ilaat tassaapput aningaasaqarnikkut aaqqissuussinerit. Danmarkimi atuartut Danmarkimi efterskolimiinnissaminut tapiiffigineqarnissamut periarfissaqarput, aamma atuartut nunanit allaneersut. Aaqqissuussineq taamaattoq Savalimmiuni Kalaallillu Nunaanni atuutinngilaq, aammalu nunani avannarlerni killerni efterskoleriarnissaq aningaasaqarneq eqqarsaatigalugu orniginarnerulersinniarlugu aningaasatigut tapiiffigineqarnissamik qinnuteqarnissamut periarfissaqarnissaq pisariaqarpoq.

Savalimmiuni aaqqissuussineq ima aningaasalersorneqarpoq ingerlatsinermut aningaasartuutit 70%-ii tikillugit aammalu pigisanik atuartitsissutinillu pisiortornermut aningaasartuutit 50%-ii tikillugit Savalimmiunit akilerneqartarlutik kiisalu illuutinik assigisaannillu pisinermi naliusup 50%-ia tikillugu ernialersugaanngitsunik akilersugasaanngitsunillu taarsigassarsisitsisoqartarluni. Kommunini anginerni tallimani atuartunut tamanut ingerlatsinermut aningaasartuutit tunngavigalugit agguaqatigiissillugu aningaasartuutit 70%-iat atuartup kommunianit angerlarsimaffigisaanit akilerneqartarpoq.

Nunani avannarlerni killerni nunani efterskoleriartoqarnerani taarsiissuteqartarnissaq pillugu nunani avannarlerni killerni naalakkersuisut suleqatigeeqqullugit Nunat Avannarliit Killiit Siunnersuisoqatigiiffiannit kaammattorneqarput. Tamatumunnga taarsiullugu nunani avannarlerni killerni naalakkersuisut assersuutigalugu nunani avannarlerni killerni inuusuttunut efterskolimiinnissamut "aningaasatut tunissutinik" (legatinik), inuusuttut nunani avannarlerni killerni nunat ilaanni najugallit qinnutigisinnaasaannik, pilersitsisinnaapput.

Nunani avannarlerni killerni inuusuttut nunani avannarlerni killerni nunani efterskoleqataanissami periuseq eqaannerusoq pillugu nunani avannarlerni killerni naalakkersuisut suleqatigeeqqullugit Nunat Avannarliit Killiit Siunnersuisoqatigiiffiannit kaammattorneqarput.